

第一屆

公開組

冠軍

〈假山〉潘兆賢

假山疑幻復疑真，別具桃源別具津。
眼底直窮千里勝，案頭常供四時春。
豪門雖侈無奇趣，筆舍偏幽有異珍。
欲借此間營小築，坐令詩思日趨新。

亞軍

〈自題蝸居〉黃應統

圖南倦羽阻風塵，營宅炎荒老海濱。
室小儘容花作客，樓高堪與月為鄰。
笑談敢附鴻儒雅，來往還同牧豎親。
劫罅獨留天一線，帽山長隱葛懷民。

季軍

〈中秋無月携兒遊河畔公園〉蘇文玖

莫道中秋月永圓，冰輪隱曜惹情牽。
風雲變幻三千界，人事滄桑四十年。
兩岸絃歌來士女，一河舟楫待嬋娟。
觀燈不復童心樂，歸向長檠伴子眠。

優異獎*

〈錦田春遊〉王忠義

水遶平林綠一圍，江村幽處約忘機。
樽前春事無深淺，亂後人間祇是非。
細雨藏山鳩喚急，岸風噓草蟻浮歸。
來遲敢恨忽忽去，且倩靈英扁岫扉。

〈初夏書懷〉白福臻

沈沈夏雨接三春，慘綠愁紅總困人。
世外身名憐易老，天涯消息遠難真。
荒蕪草木嵇康懶，敝垢衣冠原憲貧。
野叟近來無俗事，農書茶譜日相親。

〈偶成〉張江美

舊瓶新酒應時流，誰道詩為古者謳。
欲以一心開萬代，休從片面論千秋。
出門每察神人鬼，入世終虞風馬牛。
生也有涯無自棄，行藏不負少年頭。

〈偶望〉黃瑞松

長廊寂寞染輕埃，月季殷勤去後開。
花事每因心事改，水波猶逐眼波洄。
不辭雨冷迷香徑，依舊風聲立露臺。
偶望重門深閉處，當時曾見故人來。

〈烟景〉戴寶蓮

如烟如雨暗前溪，霧靄蒼茫雁字低。
綠醉紅酣芳蝶舞，山深林密嫩鶯啼。
春回又見千巖翠，老去方知百感齊。
送馬迎羊添悵惘，凭闌無那夕陽西。

特別獎*

〈登太平山〉招祥麒

為愛鑪峰晚，飛車跨綠林。
亭高風景闊，日落水雲陰。
滄海連天淨，層樓隱霧深。
擷芳懷遠道，感事益沉吟。

〈濟渡圖〉徐應瀚

奮施雙臂力，恥借一帆風。
但願人皆濟，何妨我獨窮。
消君揭厲苦，仗此漿篙功。
彼岸思同達，和衷應共融。

〈避風塘〉陳國英

不掛雲帆不弄潮，塘中十艇九停橈。
豈知人海風能避，翻使仙源景別饒。
近水樓臺疑月殿，連山燈火訝星橋。
歌聲催舞堤邊柳，滿眼春光未易描。

〈柳〉衛錫暉

一番風信一新條，煙雨樓臺共暮朝。
重院繫餘殘斷夢，長亭拂盡去來潮。
既陪李白金陵酒，復咽秦娥灞上簫。
綠浪漸成鶯漸老，寄情猶是玉波橋。

* 排名按姓氏筆畫序

學生組

冠軍

〈登華山〉

姚道生 香港中文大學
久聞西岳壯，拄杖上仙鄉。
渭水雲邊過，蓮華霧裏藏。
天心看浩蕩，世路易徬徨。
暫棄紅塵遠，羣山正混茫。

〈孤城〉

梁樹楓 香港中文大學
北里嚴風至，愁如春草生。
雲霓遮白日，狐鼠擾孤城。
夢幻三千劫，胸懷十萬兵。
未盲心眼在，不敢賦昇平。

亞軍

〈送友人以明志〉

文啟斯 聖芳濟各書院
剝復尋常事，殘春豈用留。
清風長作伴，濁酒盡銷愁。
松菊存三徑，賢豪樂一丘。
五湖烟水闊，何不泛輕舟。

〈觀潘天壽所畫《雨後千山鐵鑄成圖》〉

陳芷珊 香港中文大學
九派茫茫去，長雲抹遠空。
淡煙低渡水，落葉細隨風。
一渚生天籟，羣山奪化工。
好邀垂釣叟，放棹畫圖中。

季軍

〈讀中學校刊〉

陳永謙 嶺南學院
舊冊重披閱，怡然返少時。
故容疑未變，往夢實難持。
雪盡鴻蹤滅，風高雲影移。
莫悲歡笑寡，唯嘆逝如斯。

〈羊年一九九一〉

劉月穎 基朗中學
話說羊年好，逢人道吉祥。
家家期富足，戶戶保康強。
少壯須勤奮，工商要擴張。
同心謀穩定，邁步向繁昌。

優異獎*

〈悲回鄉〉

方釗 香港樹仁學院
客旅七年久，歸鄉竟斷腸。
蒼蠅盈市肆，碩鼠據官倉。
沙地起高廈，浮雲蔽夕陽。
登高無限意，吟罷更心傷。

*排名按姓氏筆畫序

〈旅思〉

王治威 東華三院陳兆民中學
宵深愁夜雨，點滴到平明。
寂寂花枝倦，飄飄柳絮輕。
空鐘鳴古剎，薄靄掩孤城。
獨作尊前客，誰知久別情。